

НОГИРОНЛИГИ БҮЛГАН ШАХСЛАР ХУҚУҚИ ҚАНДАЙ ҲИМОЯЛАНГАН?

4.

[@Xolisnazar](#)

[@Xolis_nazar](#)

[www.xolisnazar.uz](#)



№ 8
(2042) 2022 йил
26 февраль

Mahalla

2-
бет

Маҳалла
раислари
нега 5 йилда
сайланмаяпти?

9-
бет

Милион
долларлик
китоблар
қайтариладими?

5-
бет6-7
бетлар

СПОРТ ФЕДЕРАЦИЯЛАРИДА
РАҲБАРЛАРНИ САЙЛАШ
КЕРАК, ТАЙИНЛАШ ЭМАС...

ХУҚУМАТ ИХЧАМЛАШСА, БЮДЖЕТ ҲАМ ИХЧАМЛАШАДИ



2-3-бет



«INTERMED»

МОНОПОЛ
ТАШКИЛОТЛАРНИНГ
ЯНГИСИМИ?

9-
бет

МУСОБАҚАЛАРГА
ПУЛИ БОРЛАР
КАТНАШАДИМИ?

12-
бет

ХУКУМАТ ИХЧАМЛАШСА, БЮДЖЕТ ҲАМ ИХЧАМЛАШАДИ

(1-мақола)



Куни кечаки иккита янги ту-
зилма – Туризм ва маданий
мерос вазирлиги ҳамда Спортни
ривожлантириш вазирлиги ту-
зилиши ортидан Ўзбекистондаги
вазирликлар сони 25 тага етди ва
бу кўрсаткич бўйича Марказий
Осиёда, шунингдек, МДҲ давлат-
лари орасида ягонамиз. Қолавер-
са, қўмита, агентлик, инспекция,
марказ ва ўюшмалар сони бун-
дан ҳам кўп. Давлат секторининг
ҳажми ортса ортятки, асло
қисқармаяпти (тўғри, айрим
давлат идораларида қисқарти-
ришлар бўлди, лекин бу умумий
кўринишни ўзgartирмайди).
Хўш, ушбу вазиятда тузилмалар
сонини ошириш эмас, қисқарти-
риш энг яхши ечим эмасми?

МУАММО НИМАДА? Бошқарув
тизимида давлат органлари сони
кўп бўлар экан, ўз навбатида,
уларга кетадиган харажатлар ҳам
жуда салмоқли бўлади. Ҳатто
давлат иштироки шарт бўлмаган
соҳа ва тармоқларда ҳам дав-
латсифат ўюшма, ассоциация ва
шунга ўхаш идоралар ташкил
этилганки, бу билан фақат дав-
лат бюджетидан пул оладиган
ташкилотлар кўпайган, холос.

Мисол учун, биргина қишлоқ
хўжалиги бўйича иккита вазир-
лик ва учта қўмита, яъни Қиши-
лоқ хўжалиги вазирлиги, Сув
хўжалиги вазирлиги, Ипакчилик
ва жун саноатни ривожланти-
риш қўмитаси, Ўрмон хўжалиги
давлат қўмитаси, Ветеринария ва
чорвачиликни ривожлантириш
давлат қўмитаси фаолият юрит-
моқда. Ёки бўлмаса, бугун турли
соҳалар бўйича 18 та инспекция
бор. Айримлари бир-бирининг
функциясини тақоррлайди.
Фаолияти таҳлил қилинса, акса-
риятида шаффофлик йўқ, ёпиқ
тузилма. Бундай давлат органи,
демакки, бюрократия нега ке-
рак? Бюрократия бор жойда эса
коррупция ҳам, турли негатив
факторлар ҳам кўпайши аниқ.

Бир-бирини тақоррловчи
бундай вазирлик ва идоралар
хукумат таркибида мавжуд-
лиги бюджет харажатлари
ошиши билан бирга, соҳаларда
функциялар тақоррланишига,
ўзаро ўхаш ёки зид меъёрий
хужжатлар қабул қилинишига
ҳам олиб келмоқда. Шу ўринда
Адлия вазири Русланбек Давле-
товнинг: «Хукумат ихчам бўлиши
керак. Ўзбекистонга жуда катта
давлат аппарати тўғри кел-

**Кўп ҳолат-
ларда хусусий
сектор давлат-
га қараганда
яхши ишлайди.**

майди. Унга кетадиган ҳара-
жатлар жуда кўп. Ундан кўра,
иктисодни ривожлантиришга
йўналтишишимиз керак. Қанча
давлат органи кўп бўлса, шунча
иктисодиёт юриб кетиши қийин
бўлади», деган фикрлари бежиз
эмаслигини эслаш кифоя.

НИМА ҚИЛМОҚ КЕРАК? *Ихчам*
хукумат тушунчаси бутун дав-
лат бошқарув тизимида тат-
биқ этилиши ҳаёттий зарурат.
Буни мавжуд штат бирликлари
сонини қисқартириш ёки «сокра-
щенія» деб нотўғри тушунмас-
лик керак. Аксинча, оптималлаш-
тириш жараёни давлат органла-
рига юклитилган вазифаларни
қайта кўриб чиқиш натижасида
тақоррловчи ёки самарасиз функцияларни аниқлаш ва бартафар
этиш орқали тизимни тақомил-
лаштиришга қаратилиши ло-
зим (қисқартиришларни ўтган
даердаги каби фақат шифокорлар
ва ўқитувчилар ҳисобига хастпуш-
лашдан қочиш керак).

**Шунингдек, ҳар бир орган ўзи-
га юклитилган вазифани қиласди-
ган, функциялари тақоррланмай-**


диган, давлат органининг ҳар бир
ходими фақат ўзига юклитилган
иши бажарадиган ва ўшанга
ойлик оладиган тизим керак. Ҳар
бир ходимнинг фаолияти аниқ
мақсадларга йўналтирилар экан,
эндиликда бир-бирини тақорр-
лайдиган идоралар, функциялар
бўлиши мумкин эмас.

**Қолаверса, бошқарув тизи-
миди «бир масала – бир муам-
мо» тамоилини жорий қилиш
вакти аллақачон келган.** Зоро,
кўп кўрганмиз, одамлар оддий
кундалиқ масалалар, мисол учун,
ер ажратиш, тадбиркорлик фао-
лиятини йўлга кўйиш, банкдан
кредит олиш жараёнида ҳам
турли идоралар эшиги олдида
саргаяди. Ваҳоланки, фуқаро-
ларда ерни кадастр, лицензияни
Давлат хизматлари маркази, кре-
дитни банкнинг ўзида ҳал этиш
имконияти бўлиши керак.

**Бундан ташқари, хусусий
сектор бажаши мумкин бўлган
соҳаларда умуман давлат идо-
раларини ташкил қиласлиқ ва
борларининг ваколатларини ҳам
хусусий секторга ўтказиб юбо-
риши мақсадга мувофиқ.** Зоро, кўп
ҳолатларда хусусий сектор дав-
латга қараганда яхши ишлайди.
Бу борада қатор ҳужжатлар қабул
қилинмоқда, лекин амалда нима
бўляпти? Ҳозирча биз кутганча-
лик ўзгаришлар йўқ.

P/S. Айни ўнналишдаги наебат-
даги мақолаларимизда давлат
ташкилотларининг бугунги
фаолияти, уларнинг қанчалик
самарали (ёки самарасиз) ишлает-
гани, турли вазирлик ва идоралар
хузурида тузилган жамғармалар
ўзини қай даражада оқлаётгани
ҳақида фикр-мулоҳаза алмашамиз.

Санжар ИСМАТОВ.



МАҲАЛЛА РАИСЛАРИ

нега 5 йилда
сайланмаяпти?

Айни кунларда барча маҳаллаларда фуқаролар йигини раислари сайловига тайёргарлик бошланди. Бу каби сайлов сўнги бор 2019 йилда бўлиб ўтган.

Агар «Фуқаролар йигини раиси (оқсоқоли) сайлови тўгрисида»ги қонунга қарасак, ҳаммаси рисоладагидек кетяпти. Чунки қонун билан фуқаролар йигини раиси (оқсоқоли) сайловини ўтказиш билан боғлиқ бир қатор янги қоидалар ўрнатилган бўлиб, муҳим ўзгаришлардан бири, бу фуқаролар йигини раиси (оқсоқоли) сайлови тўгрисида бўлиб ўтган.

Демак, 2022 йилда маҳалла раисларига сайлов ўтиши эътироозга сабаб бўлмаслиги керак. У ҳолда ходимлар нимадан безовта? Иккiloniшининг сабаби нимада? Гап шундаки, Ўзбекистон Республикаси Президентининг «Жамиятда ижтимоий-маънавий муҳитни соғломлаштириш, маҳалла институтини яна-да қўллаб-куватлаш ҳамда оила ва хотин-қизлар билан ишлаш тизимини янги даражага олиб чиқиши чора-тадбирлари тўгрисида»-ги фармонига кўра Ўзбекистон Республикаси Олий Мажлиси палаталари, Ўзбекистон Республикаси Президенти хузуридаги Фуқаролик жамиятини ривожлантириш бўйича маслаҳат кенгаши, «Тараққиёт стратегияси» маркази ва кенг жамоатчиликнинг фуқаролар йигини раиси беш йил муддатга сайланниши ҳақидаги такифи маъқулланган эди. Ҳамда шу фармон асосида 2020 йил май ойигача Маҳалла ва оилани қўллаб-куватлаш, Адлия вазирлиги ҳамда манфаатдор вазирлик ва идораларга Фуқаролар йигини раисини сайлаш муддатни узайтириш, сайлов жараёнини тақомиллаштириш ва очиқлигини таъминлаш бўйича қонун лойиҳасини ишлаб чиқиш ва киритиши вазифасига юкланган эди.

Сезганингиздек, Президент фармонига кўра, 2024 йилда маҳалла раислари сайлови бўлиши керак. Аммо бугун барча йигинларда раислар сайловига тайёргарлик бошланганини қандай тушуниш мумкин? Нима учун Президент фармонида кўрсатилган топшириқ бажарилмаяпти?

Маҳалла ва оилани қўллаб-куватлаш вазирлиги мутахассисларининг маълум қилинчича, фармон асосида янги қонун лойиҳасини ишлаб чиқилган ва қабул қилишга юборилган. Аммо ҳозиргача шу қонун қабул қилинмагани учун Президент айтганидек, 5 йил эмас, балки эски тартибда 3 йилда сайлов ўтиши режалаштирилмоқда.

Хўш, Президент фармонини бажарилмаслигига ким айбдор? Нега қонун қабул қилинмади?

Хайрулло АБДУРАҲМОНОВ.

Бу каби жамғармалар тұла тағтиш этилган ҳолда, бутунлай тугатилиши лозим.

РАКУРС

Məhalla 3

№8 (2042)

ХУКУМАТ ИХЧАМЛАШСА, БЮДЖЕТ ҲАМ ИХЧАМЛАШАДИ

(2-мақола)

Жамғарилған жамғармалар қачон очылданади?



Сир эмас, қарийб ҳар бир вазирик, құмита ва идоранинг ўз «чүнтак»лари, яғни бюджетдан ташқары жамғармалари мавжуд (улар давлат болжари, ийгимлари ва солик бўлмаган тўловлар, маъмурӣ жарималар ва молиявий санкциялардан ажратмалар ҳисобига шакллантирилади). Давлат бюджетига параллел газна. Боз устига, улар мутлақо ёпик. Шу кунгача бирон марта на жамоатчиликка ва на парламентга бу каби жамғармалар ҳисбот топширмаган, маълумотларни очиқламаган, ялпи аудитдан ўтмаган. Қаердан миллиардлаб пул келяпти, қаёққа миллиардлаб кетяпти, ҳеч нима айтилмайди.

Жамғармалар қандай тўлдирилади?

Вазириклар «бу бизнинг фойда, бу жамғарма пулларини истаганча ишлатишга ҳаққимиз бор» деб кўкрак керади, аслида эса бу давлатнинг, халқнинг пули. **Бу жамғармалар маблагини давлат хизматчалири далада кетмөн чопиб топаётгани йўқ, давлатнинг идорасида, давлат берган ваколатдан фойдаланиб даромад оляпти.** 2019 йилда ўша вақтдаги Молия вазири (хозирги Иқтисодий тараққиёт ва камбағалликни қисқартиши вазири) Жамшид Кўчкоров ҳам бюджетдан ташқари жамғармаларга қаршилигини билдирганди.

«Улар давлат биносида ўтирибди, давлат хизматини кўрсатяпти. Тўғри, бу маблағларни тушариш учун меҳнат ҳам сарфланади, масалан, жарима ундириш учун жаримани аниқлаш ва расмийлаштиши керак. Лекин барibir бу тушумлар давлатники. Биз жорий йилда жисмонан улгурмадик, аммо келаси йил давомида бундай хос жамғармалар тўлиқ назоратга олинади. Шунда адолатдан бўлади», – деган эди Жамшид Кўчкоров.

Бироқ ўтган икки йил давомида бундай назоратни кўрмадик. Балки карантин бўлгани учун «чўнтак»

жамғармаларнинг бюджетта тўлиқ консолидация қилиниши яна қолиб кетгандир. **Хўш, ҳозирги Молия вазири Тимур Ишметов Жамшид Кўчкоров бошлаган бу масаланинг охирiga етармикан?**

Яна бир гап: «чўнтак» жамғармаларни тўлдириш иштиёқи баъзан халқ зиёнига абсурд қарорлар қабул қилишга олиб келиши мумкин. Мисол учун, давлат тест маркази ўз жамғармасини тўлдириш учун абитуриентлардан тўлов ундиради. Ички ишлар вазирилиги эса «тонировка» ўрнатиш тўловини ҳамда унинг жаримасини ўта мантиқиз равишда баланд қилиб белгилаб қўйган. АКТ соҳасининг «чўнтаги»ни тўлдириш учун UZIMEI тизими ўйлаб топилди. Қолаверса, Адлия вазирилиги давлат хизматлари агентлиги тушумлари ҳисобидан бюджетдан ташқари маблағларга эга бўлади, Боз прокуратура эса Мажбурий ижро бюроси ҳисобидан ва ҳ.к.

Қонунчиликка кўра, давлат ташкилотлари жамғарма маблағларидан эркин фойдаланиши мумкин. Жумладан, улар ходимларига турли имтиёзлар бериши, қўшимча моддий рағбатлантириш мақсадида фойдаланиш ҳукуқига эга. **Бироқ бу ерда ҳам ҳақли савол туғилади:** масалан, бир ташкилотнинг жамғармаси бор ва ўша ташкилот ходимларига жамғарма пулидан ўй олиб беряпти. Лекин бошқасида бундай жамғарма йўқ бўлса, у нима учун ўз ходимларига ўй олиб бера олмаслиги керак? **Ёки жамғармаси йўқ вазирик ходимлари ёмон ишлайтими?**

2022
**йилда 23 та
давлат мақсад-
ли жамғармаси
амалда фа-
лият юритади.
Уларнинг сони
2020 йилда 20
та, 2021 йилда
эса 18 та эди.**

Нима қилмоқ керак? Аслида, давлат ташкилотларида ҳеч қандай «бюджетдан ташқари маблағлар» мавжуд бўлмайди. Яъни давлат ташкилотларидаги барча маблағлар жамоат маблағлари, оддий тилда айтганда – халқ пулидир. Демак, мисол учун, жарима орқали йигилган пуллар, ўша жарималарни йигланидига эмас, тўғри бюджетта, яъни Молия вазирилигига ўтиши керак. Борди-ю ташкилот ўз харожатларини молиялаштироқчи бўлса, марҳамат, бюджетта киритиб, қону-

ний тарзда пулини олсин. Шунда, назаримизда, давлат органлари иложи борича «пул топшиш» (айрим ташкилотлар мана шу «чўнтак»ларини қаптайтиши учун ҳам халқ елкасига янгидан янги тўловлар ўйлаб топиб, ундириш ёки тўловлар миқдорини баланд қилиб белгилаш пайида бўлади) деган мақсаддан воз кечади ва ўзларининг қонуний масъулият ва ваколатларига амал қилиш билан банд бўладилар.

Давлатта 23 та жамғарма керакми?

Жамғармалар ҳақида сўз борар экан, давлат мақсадли жамғармалари таркибига ҳам эътибор қаратиш ўринли бўлади. Жумладан, «2022 йил учун Ўзбекистон Республикасининг давлат бюджети тўғрисида»ги қонунида давлат мақсадли жамғармалари даромадлари ва харожатларига қўзимиз тушади ва **жорий йил учун 23 та мақсадли жамғарма** амалда фаолият юритишига гувоҳ бўламиз (бундай жамғармалар 2020 йил давлат бюджетида 20 та, 2021 йилда эса 18 та кўрсатилган).

Албатта, улар орасида пенсия, тадбиркорликни қўллаб-куватлаш, иктисодий тараққиёт билан боғлиқ жамғармалар бўлишини тушуниш мумкинdir, бироқ уларнинг бунчалик кўплиги амалда қанчалик самара беряётгани қатор давлатларни ўртага ташлайди.

– **Масалан, биргина Бандлик ва меҳнат муноса-батлари вазирилиги хузурида учта жамғарма фаолият юритмоқда, – дейди иқти-
содиёт фанлари доктори,
профессор Самариддин
Элмирзаев.** – Учаласини бирлаштирган ҳолда, ягона жамғарма фаолиятини ўйлга кўшиш харожатларни камайтиши орқали самарадорлик ўсишига хизмат қиласи. Яна бир жамғарма – Алкоголь ва татамики бозорини тартибга солиши ҳамда виночиликни ривожлантириши агентлигининг Виночиликни ривожлантириши жамғармаси.

Биринчидан, соҳада соглом рақобат мухити мавжуд. Иккинчидан, фаолият ўта рентабелли. Айнан шундай шароитда алоҳида агентлигу алоҳида жамғарманинг нима кераги бор, деган савол туғилиши табиий. «Ўзбек-балиқсаноат» юшмасининг Балиқчиликни ривожлантиши жамғармаси давлат бюджети тўғрисидаги қонунда тасдиқланиши ҳам тушунарсиз. Чунки юшмалар нодаеват нотижорат ташкилот ҳисобланади. Бошқа томондан, мазкур соҳада соглом рақобат мухити шакланиб бўлди. Энди бозор қонуниятлари асосида бемалол ривожланши мумкин. Шу боис бундай жамғармаларни тутгатиш вақти келди.

Умуман олганда, ўта мухим ўнтага етар-етмас давлат мақсадли жамғармаларни сақлаб қолиш, бошқаларининг даромадларини эса марказлашган бюджетта тусишини таъминлаш, харожатларни республика бюджетидан молиялаштириш ўз-ўзидан харожатлар самарадорлиги ва самарали молиявий назоратга хизмат қиласи.

Давлат ташкилоти топган пул ҳам давлатники, демакки, халқни қўлиши керак. У қайсиидир ташкилотлар кўлида қолиб кетмаслиги лозим. **Бу каби жамғармалар тўла тағтиш этилган ҳолда, бутунлай тутгатилиши, бундай зарарли «тажриба»га бошқа асло қайтилмаслиги лозим.** Агар жамғармалар орқали қайсиидир алоҳида кувватлаш лозим бўлган қатламларга ёрдам бериш ҳақида масала қўйилса, бу имтиёзли кредитлар орқали эмас, барча учун амал қиладиган солик енгилликлари ёки тўғридан-тўғри трансферлар ва нафақалар тақдим этиш орқали амалга оширилиши зарур. Шундан сўнгтина солик юки, божхона тўловлари камаяди. Одамларнинг оз бўлса-да, молиявий аҳволи яхшиланишига имконият яратилади.

Санжар ИСМАТОВ.

2020 йилда Ўзбекистон Республикаси Президенти томонидан «Ногиронлиги бўлган шахсларнинг ҳукуқлари тўғрисида»ги Қонун имзоланди. Бу билан ногиронлиги бўлган шахсларнинг ҳукуқларини таъминлашнинг асосий тамомиллари белгилаб берилди.

НОГИРОНЛИГИ БЎЛГАН ШАХСЛАР ҲУҚУҚИ ҚАНДАЙ ҲИМОЯЛАНГАН?

Гап шундаки, аввалги қонун бўйича кўп ноаникликлар бор эди. Жумладан, ногиронликни расмийлаштириш жараёни қийин ва камситувчи жараёнга айланганди. Тўғри, аввалги қонунда ҳам агар оғисларда рампалар бўлмаса, бино мослаштирилмаган бўлса ва ногиронлар учун 3 фоиз бандлик квотаси бўлмаса, ташкилотлардан жарима олиниши белгиланганди. Лекин бу тизим тўлиқ ишламасди.

Тошкентда бино ва иншоотларнинг озчилик қисми ногиронларнинг эҳтиёжларига мослаштирилган транспортлар деярли йўқ, автобуслар ва бошқа турдаги транспортларда ўйлни осонлаштирадиган ёрдамчи воситалар (овозли маякчалар ва ҳоказо) ҳам муаммо эди. Буларнинг барчаси кўзи ожиз ва эштиши чекланганлар ва бошқа ногиронлиги бор инсонларни эрkin ҳаракатланиши ва ўз ҳукуқларини амалга ошириш имкониятидан маҳрум этарди. Бекатларнинг бирортаси ногиронлиги бор кишиларга мўлжалланган қуайликлар билан жиҳозланмаганди.

Ҳатто бадий адабиётларда, айниқса, болалар адабиётида ҳам ногиронларга камситувчи образ ва қаҳрамон сифатида қараларди. Масалан, бош қаҳрамон кучли, баланд, соғлом «ғайриоддий одам» бўлса, кўпол, чўлоқ, бир кўзи кўрмайдиган шахслар салбий қаҳрамон сифатида гавдалантириларди.

«Ногиронлиги бўлган шахсларнинг ҳукуқлари тўғрисида»ги қонунда мана шу каби масалалар ечим топди. Ҳақли равишда бу қонунни миллий қонунчиликнинг ютуғи, деб ҳисоблаш мумкин. Унда илк бор ногиронлик ижтимоий ҳимоя ёки тибиёт муаммоси эмас, балки биринчи

навбатда инсон ҳукуқлари муаммоси сифатида таърифланди.

Аммо унда ногиронларнинг ҳукуқлари тўғрисида гапирилишига қарамай, ногиронликнинг таърифи ҳали ҳам инсон ҳукуқлари ҳимояси ёндашувига асосланмаган.

Ногиронлар ассоциацияси раиси Ойбек Исоқовнинг айтишича, ногиронликнинг соғ тиббий таърифи тиббий ва ижтимоий экспертизанинг эътиборини фақатгина «организмининг функциялари турғун бузилгани сабабли ҳаёт фаолияти чеклангани даражасини» аниқлашга қаратади. Ногиронликни текширувдан ўтказишнинг бундай ёндашуви ишлашнинг, ногиронликнинг ва соғликни сақлашнинг халқаро таснифи (ICF) асосидаги биопсихосоциал (биопсихоижтимоий) моделига жавоб бермайди. Бошқача қилиб айтганда, инсон ҳаёт фаолиятининг чекланганлик даражаси нафақат соғлик ҳолати, балки атроф-муҳит омиллари туфайли ҳам юзага келади.

Янги қонуннинг 6-моддасида ногиронлик белгисига кўра камситилишга йўл қўймаслик тамойили акс этирилган. Бошқача қилиб айтганда, масалан, давлат муассасасида ёки транспортда зарурий жисмоний муҳит мавжуд бўлмаса, у

**Натижада
камситилишини
ҳис қилганлар
вақтларини,
пулларини ва
кучларини
бехуда сарф
қилмаслик учун
шунчаки бунга
кўз юмишлари
тайин.**



ҳолда ногиронлар қонун асосида эрkin ҳаракатлаши учун зарур шарт-шароитларни таъминламаган ташкилотни судга беришлари мумкин. Аммо улар судга мурожаат қилишлари ва адолатта эришишлари учун ҳам шарт-шароитлар яратилганми?

Судга мурожаат қилиш кўшимча молиявий харажатларни келтириб чиқариши мумкин. Аммо ногиронлар ушбу харажатларни кўтара оладими? Афсуски йўқ. Натижада камситилишини ҳис қилганлар вақтларини, пуllibarini ва кучларини бехуда сарф қилмаслик учун шунчаки бунга кўз юмишлари тайин. Агар судларда ҳам шарт-шароитлар ва қуайликлар тақдим қилинмаса – унда улар нима ҳам қила олишарди?

Бундан ташқари, ногиронлик белгисига кўра камситилишнинг маънавий зарарини қандай баҳолаш мумкин ва уни ким қоплади? Ногиронларнинг ҳукуқий билимлари ва саводхонлигининг паст даражасини инобатга олиб, бу масалаларни барчасини яхшилаб ўйлаб чиқиш керак.

Аввалги «Ногиронларни ижтимоий ҳимоя қилиш тўғрисида»ги қонунда «Ногиронларнинг ижтимоий инфратузилма обьектларига тўскинликсиз киришини таъминлаш, транспорт, транспорт коммуникациялари, алоқа ва ахборотдан фойдаланиш бўйича мажбуриятларни бажармаганлиги учун» маъмурий жавобгарлик кўзда тутилган эди.

Аммо Тошкент шаҳар ҳокимлиги ҳузуридаги Жамоатчилик кенгашининг маълумотларига кўра, «бинолар ва ижтимоий инфратузилма обьектларининг 85 фоизи ногиронлар фойдаланиши учун мослаштирилмаган». Пойтахт транспорт инфратузилмаси ногирон-

лар ҳаракатланиши учун мослаштирилмаган экан, вилоятлардаги аҳвол ҳақида гапирмаса ҳам бўлади.

Мавзу юзасидан Ногиронлар жамияти раисининг биринчи ўринбосари Ботир Омонтурдиевнинг таъкидлашиб, БМТ нинг «Ногиронлар ҳукуқлари тўғрисидаги Конвенция»сini ратификация қилиниши муносабати билан «Ногиронлар масаласи билан шугулланувчи кўмита» ташкил қилиш лозим. Бу Ўзбекистонда имконияти чекланганларни ижтимоий ҳимоя қилиш тизимининг такомиллашувида муҳим қадамлардан бири бўлади.

Олий таълим муассасаларида имконияти чекланганларнинг тўсиқсиз ҳаракатларини таъминлашга қаратилган нормаларнинг ўргатилиши бўйича кўшимча фан киритиш керак. Ногиронларнинг транспорт воситаларидан фойдаланишида ва иш жойларида эрkin ҳаракатлана олишига ҳалақит берадиган тўсиқларни бартараф этиш ва уларни тегишли техник воситалар билан таъминлаш тизимини йўлга қўйиш лозим.

Ногиронлиги бўлган шахсларни келгусида маҳаллий кенгаш ва Олий мажлис депутатларига номзодларини кўрсатиши учун квота ажратиш ҳам жуда муҳим. Шунингдек, ногиронлиги бўлган шахсларни автотранспорт хайдовчилигига ўқитишида алоҳида худудлар кесимида лоақал 1 тадан бўлса ҳам автомактаблар ташкил қилинмаган. Қолаверса, ногиронлиги бўлган шахсларни иш билан таъминлашда ЯГОНА электрон платформа яратиш фуррати аллақачон етиб келган.

Мақсадбек ФАЙЗ.



ХОЛАТ

КОММУНАЛ ХИЗМАТДАГИ МУАММОЛАР ҲАНУЗ БАРҲАМ ТОПМАЯПТИ

2021 йил «Гавҳар» хусусий уй-жой мұлқорлар ширкатига белгиланган 687 минг сүм тұловни амалға оширдім. Бироқ хизмат күрсатыши сифатидан нағақат мен, балқи башқалар ҳам норози. Үз муддатини үтаб, авария ҳолатида турған ертұладығы исеклик күвурларининг алмаштирилмағаннан сабаб хонадонларда исеклик мөбөри етарлы эмас. Шу боис ахоли құшымча иситиш күрималарини құлашга мажбур. Хонадон әгалари, ҳатто асосий (шахта) күвурларни ҳам үз қысқыдан алмаштиришга мажбур бўляпти.

Албатта, бу муаммолар янгилик эмас. Бироқ бу соҳада давлат раҳбари бир қатор ташаббус күрсатыб, зарур қарор ва фармонлар қабул қилишига қарамасдан, масъуллар үз масъулиятини етарлича англаб етмаётгандай. Масалан, Президентнинг 2017 йил 18 апрелдаги «Ўзбекистон Республикаси Уй-жой коммунал хизмат күрсатыши вазирилиги фаолиятини ташкил этиш тўғрисида»ги қарорига асосан, вазирилик зиммасига уй-жой коммунал хизмат күрсатыши соҳасига оид мөбөрий-хуқуқий базани такомиллаштириш бўйича таклифлар ишлаб чиқиши, ривожланган хорижий давлатларнинг илгор тажрибаси ҳисобга олинган ҳолда, уй-жой коммунал хизмат күрсатышининг замонавий шакл ва усулларини ишлаб чиқиши ҳамда жорий этиш вазифаси белгиланган бўлса-да, ҳамон уй-жой коммунал хизмат күрсатышининг замонавий шакллари кенг татбиқ этилганий ўйқ.

Давлат раҳбари 2018 йил 26 октябрь куни Юнусобод туманига ташрифи ҷоғида профессионал сервис компаниялари ташкил этиши орқали кўп қаватли уйларга хизмат күрсатишини яхшилаш, моддий-техник базани мустаҳкамлаш, иқтисодий барқарорликни таъминлашга қаратилган тақдимот лойиҳасини ўша мавсумдаёқ татбиқ этиши, ҳар бир кўп қаватли уйнинг эгасини топиб, уларга имтиёзлар бериш зарурлигини таъкидлаган эди.

Бироқ Юнусобод тажриба-си 2018 йилда эмас, 2020 йил тажриба тарқасида амалга татбиқ этилиб, тумандаги 110 та кўп қаватли уй башқарув сервис компанияларига берилди. Бу тажриба 2021 йил барча вилоят марказларида, Чирчиқ ва Ангрен шаҳрида давом эттирилиб, 15 та башқарув компанияси ташкил этилди, холос.

Маълумотларга кўра, айни пойтада пойтахтда 561 та оғир тоифадаги Хусусий уй-жой мұлқорлари ширкати мавжуд. Уй-



**Ахоли эса тў-
лаган пулига
яраша сифатли
хизмат кўрса-
тилишини яна
беш йилдан ке-
йин эмас, айнан
буғун исташяп-
ти.**

тасдиқлаши зарур эди. Танловга кўйиладиган кўп квартирали уй-жой фонди лотларининг рўйхатини аниқлаб, ушбу рўйхатни очиқ ҳолда, шу жумладан, Тошкент шаҳар ҳокимлигининг расмий веб-сайтида эълон қилиниши белгиланган. Қолаверса, ушбу ҳужжатда кўп квартирали уйни сақлаш, ундан фойдаланиши ва таъмилаш учун башқарув компанияси билан намунавий шартнома ишлаб чиқилиши қайд этилган. Айнан ушбу қарор билан кўп квартирали уй-жой фондини башқарув компаниялари томонидан башқариш тизими белгилаб берилган.

Энг муҳими, ушбу қарор билан башқарув компаниялари республикада ишлаб чиқарилмайдиган ва белгиланган тартибда тасдиқланадиган рўйхат бўйича олиб келинадиган курилиш техникаси, кичик механизация воситалари, материаллар ва ускуналар учун божхона тўловларини тўлашдан (божхона расмийлаштируви یїғимларидан ташқари) озод этилган. Афсуски, ҳамон аксарият ХУМШларда зарур асбоб-ускуналар ўйқ.

Санайверсак, бундай имконияту имтиёзлар, фармону қарорлар талайгина. Бироқ 5 йилдан бўён бир тизимни йўлга кўя олмаган вазирликдан яна нимани кутиш мумкин?! Ахоли эса тўлаган пулига яраша сифатли хизмат кўрсатилишини яна беш йилдан кейин эмас, айнан буғун исташяпти.

Демак, масъуллар турли-туман тақдимот ва тажрибалар қўллай-вермасдан, соҳага оид амалдаги мөбөрий хуқуқий ҳужжатлар ижросини тезкор бажаришга киришиши, Президент айтган башқарув сервис компанияларини шу йилдан қолдирмасдан, кампаниябозлиқ асосида эмас, кўп квартирали хонадонларда яшовчи ахоли ҳақиқатдан ҳам самарали тизим эканини ҳис этадиган даражада амалиётга татбиқ этишлари зарур.

Достон РУСТАМОВ.

Фуқароларнинг мурожаатига кўра, Миробод туманидаги «Yoshlar mehnat guzari» гўёки ёшлар учун эмас, бизнес учун ташкил этилган. Унда озиқ-овқат савдо дўкони, дорихона ва меҳмонхона фаолият кўрса-таётгани қайд этилган.

**«ЁШЛАР МЕҲНАТ ГУЗАРИ»
РОСТДАН
ЁШЛАРНИКИМИ?**



Хўш, бу ҳолат қанчалик асосли? Президентнинг 2018 йил 27 июндаги «Yoshlar – kelajagimiz» давлат дастури тўғрисида ги фармонига асосан, давлат-хусусий шериклик шартлари асосида савдо-маиший ва кичик ишлаб чиқариш майдонларини ташкил этиш учун меҳнат кучи ҳаддан зиёд бўлган туманларда «Yoshlar mehnat guzari» комплекслари қурилиши белгиланган.

Вазирлар Маҳкамасининг 2018 йил 27 ноябрдаги «Yoshlar – kelajagimiz» давлат дастури доирасида амалға ошириладиган тадбиркорлик лойиҳаларини қўллаб-куватлаш чора-тадбирлари тўғрисида ги қарорида эса «Yoshlar mehnat guzari» комплекслари – чакана савдо ва маиший хизматлар күрсатиши фаолиятини ташкил этиш учун тадбиркорлик субъектларига имтиёзли шартларда ижарага жой ажратиши орқали ёшларни иш билан таъминлашга мўлжалланган мажмуя эканлиги қайд этилган.

Назаримизда, фуқароларнинг эътирози ўринсиз. Бироқ, давлат раҳбари фармонида қайд этилганидек, «Ёшлар меҳнат гузари» комплексларида кичик ишлаб чиқариш майдонлари ҳам ташкил этилиши белгиланган.

Юқоридаги ҳужжатлар асосида худудларда «Ёшлар меҳнат гузари» билан бирга, «Yosh tadbirkorlar» коворкинг марказлари ҳам ташкил этилиши белгиланган. Ушбу марказ эса ёшлар тадбиркорлиги субъектларига имтиёзли шартларда бинолар,офис техникаси ва сарфлаш материалларини ижарага бериш, уларни Интернет жаҳон ахборот тармоғи билан таъминлаш, шунингдек, ёшларнинг бизнес ташаббуслари, стартаплари, ғоялари ва лойиҳаларини амалға оширишга башқача кўмак бериш, жумладан, бизнес режалар ишлаб чиқиши, маслаҳат, юридик, бухгалтерия ва башқа хизмат турларини күрсатиши, форумлар, маҳорат дарслари ва семинарлар ташкил этишга мўлжалланган мажмуадир.

Афсуски, ёшлар бандлигини таъминлашга мўлжалланган ҳар иккала комплекс мажмуалари худудларда етарлича курилгани ўйқ, Борларининг эса қандай фаолият юритаётганини назоратга олиш муҳим. Негаки, улар учун ер майдонлари «ноль» қийматда ёки бўш турган обьектлар текинга берилган. Демак, ишончни оқлаш ҳам зарур. Бунинг учун эса масъуллар фармон ва қарорда кўрсатилган талаблар ижросини таъминлаш юзасидан қатъий назорат ўрнатиши лозим.

Энг муҳими, ёшлар учун яратилаётган бундай имкониятлар кимларнингдир тадбиркорлик маконига айлануб қолмаслиги лозим.

Мақсад ҚўЧҚОРОВ.

СПОРТ ФЕДЕРАЦИЯЛАРИДА РАҲБАРЛАРНИ САЙЛАШ КЕРАК, ТАЙИНЛАШ ЭМАС...



Ўтган ҳафта ўзбек спортида бир қатор муҳим ўзгаришлар юз берди. Жумладан, Туризм ва спорт вазирлиги негизида Туризм ва маданий мерос вазирлиги ҳамда Спортни ривожлантириш вазирлиги тузилди. Президент фармони билан Савдо-саноат палатаси раиси Адҳам Икромов Спортни ривожлантириш вазiri этиб тайинланди. Шу билан бирга, Миллий Олимпия кўмитаси раиси Рустам Шоабдураҳмонов ўз аризасига кўра ишдан бўшади. Янги раҳбар МОҚнинг навбатдан ташқари Бош Ассамблеяси ийғилишида сайланиши қайд этилди.

Хўш, спорт тизимида-ги бу ўзгаришлар нимани англатади? Бу янги Олимпиада циклига тайёргарлик жараёнлари билан боғлиқми? Умуман, спорт соҳаси нега ийлар давомида бир у ташкилотга, бир бунисига кўшиб келинди? Унинг ягона эгаси йўқми? Спорт федерацияларига турли ташкилот раҳбарларининг «куратор» сифатида бириклиши натижага беряптими?

Спортнинг эгаси йўқ...(ми?)

2016 йилда Маданият ва спорт ишлари вазирлиги бор эди. Бу тузилма 2017 йил 15 февралда Жисмоний тарбия ва спорт давлат қўмитасига, 2018 йил 5 марта эса Жисмоний тарбия ва спорт вазирлигига айлантирилди. Орадан уч йил ўтиб, 2021 йил 6 апрелда Туризм ва спорт

вазирлиги этиб қайта ташкил этилган тузилма жорий йил 18 февралда Спортни ривожлантириш вазирлиги сифатида мухрланди.

Кўриниб турибдики, спорт соҳаси сўнгги беш йилда гоҳ у ташкилот билан, гоҳ буниси билан уйғуллаштирилди. Ўзи алоҳида мақомга эга бўла олмади. Кўмита бўлди, вазирлик бўлди, кўшилди, айрилди, яна кўшилди, яна ажратилди... Қизик, вазирлик номи ўзgartирилса ёки у тинимсиз ажратиб-кўшиб турилса, ишлар зўр бўлиб кетадими? Бу билан спортни ривожлантириб бўладими? Энг ачинарлиси, шу йиллар давомида спортни бошқарган ва бошқараётгандар бу соҳага мутлақо алоқаси йўқ одамлардан иборат бўлди.

Тузилманинг аниқ мақомга эга бўлмагани, ҳали номи, ҳали «эга»си ўзгара-вергани натижаларда акс этмасдан қолмади. Мисол учун, «Токио – 2020» ёзги Олимпиада ўйинларида Ўзбекистон вакилларининг кўрсаткичлари (учта олтин, иккита бронза) спорт соҳасида олдинга эмас, орқага қараб кетаётганимизни англатади. Такъослаш учун: Токиода «Рио – 2016» Олимпиадасида кўлга киритилган натижанинг (тўртта олтин, иккита кумуш, еттита бронза) ярмига ҳам эриша олмадик. Ё бўлмаса, куни кечга якунланган қиши Олимпиада ўйинларида Ўзбекистондан атиги битта спортчи иштирок этганини қандай изоҳлаш мумкин? Ваҳоланки, Қишки спорт

Наҳотки, Ўзбекистонда спортнинг нон-тузуни еган, аччик-чучугини томган бирорта кадр топилмаса?

турлари ассоциация 2011 йилда ташкил этилган.

Шунча вазифа битта амалдорга кўплик қиласи

Ўзбек спортида яна бир қизик «анъана» шаклланган. Яни деярли барча спорт федерациялари ва ассоциацияларига давлат амалдорлари раҳбар қилиб кўйилган. Кимдир бунга «мажбурий» кўйилган, кимдир пиар учун, яна бошқаси шунчаки назорат қилиш учун бириклирилган. Жумладан:

Сенат Раиси Танзила Норбоева – Велоспорт федерацияси;

Сенат Раисининг биринчи ўринбосари Содик Сафоев – Регби федерацияси;

Бош вазирнинг биринчи ўринбосари Очилбой Раматов – Бокс федерацияси;

Бош вазир ўринбосари, Туризм ва маданий мерос вазiri Азиз Абдуҳакимов – Шахмат федерацияси;

Адлия вазири Русланбек Давлетов – Баскетбол федерацияси;

Миллий гвардия қўмодони Рустам Жўраев – Кўлжанги федерацияси;

Курилиш вазири Ботир Зокиров – Оғир атлетика федерацияси;

Энергетика вазири Алишер Султонов – Байдарка ва каноэда эшқак эшиш (Rowing & Canoe) федерацияси;

Олий ва ўрта маҳсус таълим вазири Абдуқодир Тошкулов – Волейбол федерацияси;

Мудофаа вазири Баходир Курбонов – Аракаш жанг санъати ассоциацияси (MMA);

Президент ҳузуридағи Хавфсизлик кенгаши котиби Виктор Махмудов – Триатлон федерацияси;

Бош прокурор Нигматилла Йўлдошев – Кураш федерацияси;

Маданият вазирининг биринчи ўринбосари Баҳо-

дир Аҳмедов – Чим устида хоккей федерацияси;

Тошкент шаҳар ҳокими Жаҳонгир Ортиқхўжаев – Йога федерацияси;

Ўзбекистон Миллий банки раиси Алишер Мирсоатов – Тенис федерацияси; «Навоий кон-металлургия комбинати» давлат корхонаси бош директори, сенатор Қувондиқ Санакулов – Сузиш федерацияси; «Ўзбекнефтгаз» АЖ бошқаруви раиси Мехриздин Абдулаев – Енгил атлетика федерацияси;

«Ўзавтосаноат» АЖ бошқаруви раиси Шавкат Умурзоқов – Ўзбекистон гимнастика федерацияси;

АОКА директори Асаджон Хўжаев – Кикбоксинг ассоциацияси раҳбарлари саналади.

Ҳақли савол туғилади: наҳотки, Ўзбекистонда спортнинг нон-тузуни еган, аччик-чучугини тотган бирорта кадр топилмаса? Юқоридаги йўналишларни шу спорт турларининг ичидаги юрган кишидан ортиқ ким билади яна? (аслида, бизда аксарият спортчилар фойлиятини тутгатгач, бошини қайси деворга уришини билмай қолади. На улар кўллаб-куватланади, на тизимга жалб этилади. Оқибатда спорт яна тизимдан йирок раҳбарлар кўлида қолиб кетаверади).

Юқоридаги раҳбарлар бундан ташқари ҳам яна 2-3 та тармоқда жавобгар. Хўш, бир киши учун шунча вазифа кўплик қилмайдими? Қизик, бир куннинг ўзида амалдор лавозими-даги идораларига бориб улгурамикан? Агар ҳар бир лавозими ундан ҳар куни идорада бўлишни талаб қилмаса, ушбу мансабнинг бор ёки йўқлиги қанчалар мухим? Бир вақтнинг ўзида бир нечта тармоқда жавоб бериш кишини зўриқтириб, ишчанлигини сусайтирумайдими?

**Оғзимиз куйганидан
қаҷон сабоқ
чиқарамиз?**

Спорт тизимиning эгасизлиги, аниқ бир раҳбарнинг йўқлиги, соҳанинг ҳали у ёққа, ҳали бу ёққа тортила-вериши бошқа масалаларда ҳам панд бермай қолмади.

Жумладан, шундай давр бўлдики, тузукроқ спортчи ҳам анқонинг уруғига айланди. Оқибатда 1996 йилдан 2016 йилгача ўтказилган турли даражадаги ҳалқаро мусобақалар «маҳаллий-лаштирилган» хорижлик-ларсиз ўтмади. Ўзимизда шунча ўигитлар бўла туриб, катта пул сарфлаб, бошқа мамлакатдан спортчи ёлладик. **Кўча-кўйдаги ўигитларимизни кўздан кечириб, «сендан чемпион чиқади» дейишнинг ўрнига, вақтимиз Кавказдаги профессио-нал спорт мактабларидан спортчи қидириш билан ўтди.**

Оқибатда нима бўлди: Олимпиада голиблари сонига қиёсланса, Олимпиада медалларидан маҳрум қилинишда ўзбекистонлик спортчилар дунё бўйлаб етакчилар қаторида бўлди, десак адашмаймиз. Хусусан, допинг намуналари ижобий натижа кўрсатгани боис Артур Таймазов 2008 йилги ва 2012 йилги Олимпиада олтин медалларидан маҳрум этилди (бу борада спорт тарихида Таймазов ягона). Худди шундай, Ўзбекистон байроғи остида «Пекин – 2008»да кумуш, «Лондон – 2012»да бронза медалини қўлга киритган Сослан Тигиевнинг ҳам ҳар иккала медали допинг сабаб бекор қилинди. Хўш, буни оғзи куйиш деймизми? Бундай галабалар бизга керакмиди?

Биласиз, ҳалқаро майдонда спортчининг қаиси мамлакат шарафини ҳимоя қилаёттани инобатга олиниди, кимлиги, қаерда шугуланиши, миллати эмас. Шу боис, очиги, юқоридаги ҳолатларда медалларимиз сони камайиб қолганидан эмас, гирромлик билан бизнинг байроғимизни ҳимоя қилаётган спортчининг го-либ бўлганига куюнганимиз ҳам бор гап.

Дўпини бошдан олиб ўлаб кўрганда...

Спорт соҳаси вакилларини бир байроқ остида бирлаштириш мақсадида яхлит тузилмага айлантиришга ҳаракат қилинаётган экан, у ҳолда федерация ва ассоциация раҳбарларини «тепа»дан тайинлаш тажрибасига барҳам бериб, сайлов тизимига ўтиш зарур. Бу соҳадаги энг иирик муам-

монинг илдизи – 30 йиллик мустақил Ўзбекистон тарихида спорт федерациялари, Олимпия қўмитасига сайловлар бўлмаган, ҳаммаси юқоридан тайинланганидир (тўғри, қаисидир раҳбар спорт кенгашилари томонидан сайланди, дейилади, бироқ бир марта бўлса-да, бир ўринга икки номзод курашгани, жараён ҳақиқий сайлов тартибида ўтганини кўрмадик).

Қолаверса, давлат амалдорларини федерация раҳбарлигига тайинлаш амалиётидан воз кечиши вақти аллақачон етган. Тизимга йилдан-йилга кўпроқ маблағ ажратиляпти. Лекин натижалар тескарисига, борган сари камайиб боряпти. Бу нимадан далолат? Мониторинг йўқ, сўров йўқ, натижа учун жавобгарлик йўқ (тўғри-да, қаисидир йўналишига Сенат Раиси Танзила Норбоева, бошқасига Бош вазирнинг биринчи ўринbosари Очилбой Раматов раҳбар бўлса, қайси спорт вазири юрак ютиб улардан ҳисоб сўрайди, қониқарсиз натижалар учун койиб беради ёхуд ишдан бўшатиш билан кўркита олади?).

Яна бир долзарб муаммо – хориж давлатларидан легионер-спортчилар «импорти»га чек кўйиш керак. Ўша легионерларга кетадиган ҳаражатларни ҳам, медаль олишни ҳам ўзимизнинг ўигитларга кўйиб берайлик. Буни боксчи, курашчи, оғир атлетикачи, таэквандочиларимиз Бразилия ва Японияда исботлаб беришиди. Энди хориждан легионерлар эмас, етук мутахассисларни ҳамда спортчиларни тайёрлаш услугини тажрибасини олиб келиш зарур. Қолаверса, селекция ишларини ҳам тубдан қайта кўриб чиқиб, ҳар бир шаҳарча, қишлоқ, овул, шаҳар, посёлкаларда спортни ривожлантиришга жиддий ўтибор қаратиш керак. Шунда етук спортчилар ўз-ўзидан шаклланиб келаверади.

Ва ниҳоят, мониторинг ишлари тўғри йўлга кўйилиши, қониқарсиз натижалар учун кимдир жавобгар бўлиши керак. «Аёллар сони кўпайди, ёшлар сони ошди, авлодлар алмашинуви», деган гаплар билан мухлисларни алдаш ўзимизни алдашдан бошқа нарса эмас. Ҳалқ тўлаган соликлар ҳисобидан сўралган маблағ берилляпти-ми, марҳамат қилиб, натижа ҳам кафолатланиши керак. Йўқса, мардларча тан олиб, «шунча маблағ сарфладигу, лекин эпломадик», деб тан олишни ҳам билиш лозим.

Санжар ИСМАТОВ.

ШАХМАТДА ИҚТИДОРЛИ ЁШЛАРГА ЙЎЛ БЕРИЛМАГАН



Спортнинг шахмат тури бўйича жаҳон чемпионлари ва дунёга таникли гроссмейстерларимиз борлигидан фахрланамиз. Аммо кейинги йилларда шахматчиларимиз биринкетин Қозоғистон, Россия, Америка Қўшма Штатлари-га бутунлай кетиб қолиши моқода. Нима учун? Биз тарбиялаган спортчиларни бундай йўл тутишига нима сабаб бўляпти?

Шахмат федерацияси атрофида икки йилдирки, машмашалар тўхтагани йўқ. Спортчиларни қовуштириб тургувчи федерация кейинги пайтда жуда кўп танқидларга учрамоқда. Мисол учун, ўтган йили федерация ходимлари олти ойдан бўён маош ололмайтганлиги ва бу борада Туризм ва спорт вазирлиги (ўша пайтдаги) вазири Азиз Абдуҳакимов масалага ечим топилди деса-да, ба-рибир муаммо анча пайтгacha ўз ечимини топмаганлиги айтилган эди.

Маълумотларга кўра, Шахмат федерацияси бюджет эмас, нодавлат тарзда очилган ташкилот. У ҳомийлик ва ўзи ишлаб топган маблағлар ҳисобидан молиялаштирилади. Ҳомий сифатида «Ўзбекнефтгаз» АЖ, «Олмалиқ кон-металлургия комбинати» АЖ, «Алоқабанк» ва Алкоголь ва тамаки бозорини тартибга солиши ҳамда виночиликни ривожлантириш агентлиги бириткирилган экан. Демак, улар ўз ҳоҳишига кўра ҳомийлик қилмайди. Ҳомийлардан эса пул олиш анча мушкул.

Шахматчиларимиз нега бизни тарк этишмоқда? 12 ёшида шахмат тарихида иккинчи энг ёш ҳалқаро гроссмейстерга айланган Жавоҳир Синдоров шахматчилар федерация томонидан қўллаб-куватланмаслигини, ўтиборсизлик туфайли кўплаб шахматчилар бошқа давлат байроғи остида мусобақада қатнашишга мажбур бўлишаётгани ва ўзи ҳам шу йўлни танлаши мумкинлигини айтди. Исломбек Синдоров олти карра Осиё чемпиони, икки карра Жаҳон чемпиони бўлишига

Кўплаб шахматчилар бошқа давлат байроғи остида мусобақада қатнашишга мажбур бўлишаётгани ва ўзи ҳам шу йўлни танлаши мумкинлигини айтди.

шахматчиларга оғзаки тақиқ қўйилишидан барча аъзолар хабардор. Ҳаттоқи: «Бизнинг бир қатор иқтидорли, ёш қизларимизга йўл берилмаган. Бир қанча инсонлар эса фақат ўз яқинларини ҳалқаро турнирларга юбораверган», дега вазир А.Абдуҳакимов ҳам тан олиб гапириб ўтган.

Мавжуд ҳолатлар ёшларда норозилик кайфиятини ўйғотмаслигига ҳеч ким кафолат бермайди. Ўз чемпионларимизни, иқтидорли болаларимизни асраб қолишини ўйлаб кўриш вақти келмадими-кан? Бунинг учун, албатта, федерациянинг иш тартиби ва тамойилини ўзгартириш зарур. Спортчилар ҳам маънан, ҳам моддий тарафдан қўллаб-куватланмас экан, улардан натижа кутиши кийин.

Маълумотларга кўра, Туризм ва спорт вазирлиги томонидан 2021 йил давомида жами 6 та тадбир учун 2 млрд. 834,8 млн. сўм маблағ молиялаштирилиб, федерация томонидан 2 млрд. 208,4 млн. сўм сарфланган ҳолда, қолган 626,4 млн. сўм маблағ вазирликка қайтарилган. Айни пайтда Коррупцияга қарши курашиш агентлиги томонидан федерация фаолияти ўрганилиб, нодавлат нотижорат ташкилотлари тўғрисида ги Қонуннинг 34-моддасига асосан Адлия вазирлигига юборилган.

Балки, тузилган янги вазирлик бундай муаммоларга ечим топар. Демак, кузатишида давом этамиз.

Нилуфар ЮНОСОВА.

Ўзбекистон университетлари ХАЛҚАРО РЕЙТИНГЛАРДА НЕГА КЎРИНМАЯПТИ?

Ҳар йили етакчи университетлар рейтинги эълон қилинганда, улар қаторида мамлакатимиздаги бирор-бир олий ўкув юртнинг номини кўрмаймиз. Ҳатто «ТОП-5000» таликда ҳам улардан бирортасини топа олмаймиз. Афсуски, бу йил ҳам шу ҳолат такрорланди.

Ваҳоланки, Ўзбекистон Республикаси Президентининг «Олий таълим тизимини янада ривожлантириш чора-тадбирлари тўғрисида»ги қарорида олий таълим ташкилотлари ўртасида соғлом рақобат муҳитини яратиш, таълим сифатини янада юқори босқичга олиб чиқиш бўйича имконият, имтиёзлар ва албатта, аниқ вазифалар кўйилган эди.

Мамлакатимиз олий таълим тизимини 2030 йилгача ривожлантириш концепциясида республикадаги камиди 10 та олий таълим муассасасини халқаро эътироф этилган агентликлар (Quacquarelli Symonds World University Rankings, Times Higher Education ёки Academic Ranking of World Universities) рейтингининг биринчи 1000 та ўриндаги олий таълим муассасалари рўйхатига киритиш белгиланган.

Юқоридаги Президент қарори 2017 йилда, концепция 2019 йилда қабул қилинган. Орадан шунчак вақт ўтди. Гарчи 2030 йилгача имкон бўлса-да, ўтган даврда энг муҳим параметрлар бўйича натижага эришидими? Яъни мамлакатдаги олий ўкув юртларини «ТОП-1000» талик рейтингига киритиш бўйича қандай чоралар кўрилди?

Балки, натижалар бордир, аммо афсуски, бу ҳақда кенг жамоатчилик аниқ маълумотга эга эмас. Лекин бир нарса аниқки, лоақал 1 тагина университетимиз ҳам 1000 таликка кира олмади.

Халқаро рейтингни қўя турайлик, ҳеч бўлмаса, Евроосиё рейтингида ҳам бирорта ўзбек университети йўқ.

Ачинарлиси, Қозогис-

тон, Озарбайжон сингари давлатларнинг бир эмас, бир неча университети «Топ 1000» таликка кирган бўлса-да, биз ҳамон буни орзу қилиб яшяпмиз.

Тўғри, университетлар моддий-техник базасини мустаҳкамлаш, хорижий университетлар филиалларини ташкил этиш бўйича қилинган ишларни эътироф этмаслик инсофдан эмас. Аммо бу мезонлар олий таълим сифатини халқаро талабларга жавоб бериши учун камлик қиласди.

Аввало, ҳар бир университетнинг энг муҳим ресурси унинг олим ва ўқитувчилари ҳисобланади. Инсон капитали, яъни олим ва ўқитувчилар малакаси, билим ва тажрибасини оширишга киритилган инвестицияни энг муҳим инвестиция сифатида тан олмагунча университетларимизнинг халқаро рейтинги ошмаслиги аниқ. Инсон капиталига инвестиция фақат уларнинг маоши билан боғлиқ эмас, балки педагогик ва тадқиқот қобилиятини ўстириш ҳамда илмий даражасини оширишни ҳам ўз ичига олади.

Минг таассуфки, бизда профессор-ўқитувчилар малакаси билан боғлиқ жиддий муаммолар бор. Давлат университетларида ҳам, хорижий университетлар филиалларида ҳам ўқитувчиларнинг катта қисми магистр даражасида эканлиги муаммонинг нақадар жиддийлигини кўрсатади. Хорижий университетлар филиалларида хорижда таҳсил олган ўқитувчилар бўлса-да, уларнинг аксари илмий даражага эга эмаслиги, давлат университетларида эса хорижда таҳсил олган профессор-ўқитувчилар деярли йўқлиги ачинарли ҳол.

Тўғри, 2022 йилда Буюк Британиянинг «Times Higher Education» агентлиги «Young University Rankings - 2022» (Ёш университетлар рейтинги - 2022) рейтинг натижаларига кўра, республикадаги 4 та олий таълим муассасаси илк бор янги турдаги мақом - «Reporter» университетлар қаторида эътироф этилди. Булар Тошкент давлат юридик университети, Тошкент педиатрия

Ўзбекистон Республикасида таълим олиши учун хорижий фуқароларни жалб этиш бўйича маҳаллий ва хорижий агентликлар томонидан консалтинг хизматлари кўрсатилишининг меъёрий-хукуқий асослари яратилдими?

тиббиёт институти, Турин политехника университети, Урганч давлат университетлариридир.

Аммо бу рейтинг халқаро тан олинган 3 та рейтингга тенг бўла олмайди. Келинг, энди концепцияда белгиланган вазифалар ижросига ҳам тўхталсан.

«Study in Uzbekistan» («Ўзбекистонда таҳсил ол») лойиҳаси амалга оширилдими? Шахсан ўзим интернетда бу лойиҳа бўйича берган сўровимга из доменидан биттагина ҳавола топа олдим, холос. Қолгани net, com домендаги ҳаволалар эди. Ўша битта сайт <https://unizone.uz/> бўлиб, ким томонидан ва қандай мақсадда ташкил этилганини аниқлашнинг имкони бўлмади. Сайтда кўрсатилган телефон рақами кимнингдир шахсий рақами бўлиб чиққани янада таажжуланарли.

Мутасаддилар мамлакат таълим жозибадорлигини тарғиб қилувчи маҳсус веб-портал яратиш ва уни барча олий таълим муассасалари бўйича батафсил ва ишончли маълумотлар билан тўлдириб боришни йўлга қўйишидими? Агар бу ишлар килинган бўлса, нега очик, шаффоф маълумотлар бериб борилмаяпти? Шу лойиҳа доирасида юртимиз



олий ўкув юртларига келиб ўқиётган талабалар сони нега бундан аввалиги йиллар билан солишириб эълон қилинмаяпти?

Webometrics ташкилоти рейтинг тизимида олий таълим муассасаларининг расмий веб-сайтлари эгаллаган ўринларини яхшилаб бориш, шу жумладан олий таълим муассасалари томонидан етакчи ташкилотлар ва корхоналарда битирувчиларнинг ишга жойлашиши ҳақидаги маълумотлар, таълим йўналишлари, магистратура мутахассисликлари, илмий-техник салоҳияти, профессор-ўқитувчилар, инфратузилмаси, эришган ютуқлари каби асосий маълумотларни веб-сайтларда мунтазам равишда эълон қилиб боряптими?

Қайси хорижий мамлакатларда маҳаллий олий таълим муассасалари филиаллари ташкил этилди?

Ўзбекистон Республикасида таълим олиши учун хорижий фуқароларни жалб этиш бўйича маҳаллий ва хорижий агентликлар томонидан консалтинг хизматлари кўрсатилишининг меъёрий-хукуқий асослари яратилдими?

Бу саволларнинг барчasi айнан юқоридаги концепцияда белгиланган вазифалар ҳисобланади.

Мақола мавзусидан келиб чиқиб, Ўзбекистон Миллий университетининг бу борадаги натижаларига эътибор қаратдик. Университет сайтида мавзу юзасидан маълумотлар билан ҳам танишдик.

Маълум бўлишича, 2021 йилда Миллий университет Лондон Quacquarelli Symonds халқаро агентлиги томонидан Ривожланаётган Европа ва Марказий Осиё давлатлари бўйича 2021 йил учун энг кучли университетлар рейтинги (QS Emerging Europe and Central Asia University Rankings)да кучли 500 таликка кирган.

Сайтда халқаро рейтингга кириш учун қўйилган талаблар асосида универси-

тет режалари инфографика шаклида берилган. Жумладан, хорижий профессор-ўқитувчилар сонининг 2020 йилдан 2025 йилгача ўсиш динамикаси, магистратура, докторантура ва малака ошириш бўйича режалар, халқаро рейтингта кириш даражаси, 2025 йилгача хорижий талабалар салмоғини ошириш, халқаро қўшма дастурларнинг сонини кўпайтириш каби маълумотлар келтирилган. Унга кўра, 2020 йилда хорижий профессор-ўқитувчилар сони 105 та бўлса, 2021 йилда 282 та, 2022 йилда эса 320 тага етказиш кўзланган. Хўш, шу режа бўйича жорий йил хорижий профессор-ўқитувчилар сони 320 тага етдими?

Ёки бугунга келиб, университетдаги хорижий талабалар сони 200 тани ташкил этадими? Иш берувчилар билан университет қандай алоқалар ўрнатган? Бугун битирувчиларнинг неча фоизи иш билан таъминланниши кафолатланган?

Шу саволлар билан университет мутахассиси доцент, фалсафа фанлари доктори Жалолиддин Юсупов билан боғландик. Афсуски, юборган саволларимизга ҳамон жавоб ола билмадик.

Хулоса сифатида айтидан бўлса, биринчидан, халқаро академик ҳамжамият билан ҳамкорликни ривожлантириш, университетларни танилиш имкониятини ошириш, олий ўкув юртларимизда профессор-ўқитувчилар сонини кўпайтириш лозим. Иккинчидан, иш берувчи билан муносабатларни ривожлантириш керак. Чунки QS рейтингида айнан иш берувчининг битирувчи ҳақидаги тасаввури инобатта олинади.

Умид қиламизки, Олий ва ўрта маҳсус таълим вазирлиги ва Ўзбекистон Миллий университети юқорида келтирилган саволларга жавоб қайтаришади.

Хайрулло АБДУРАҲМОНОВ.

Ушбу пулли хизмат
бизга керакмиди?

КОРРЕСПОНДЕНЦИЯ

«INTERMED» МОНОПОЛ

ТАШКИЛОТЛАРНИНГ
ЯНГИСИМИ?

Софлиқни сақлаш вазири жуда иш билармон чиқиб қолди-ку. Нега дейсизми? Поликлиникага қон таҳлиллари топширишга бордим. Эрталабдан навбат катта. Буни қарангки, лаборатория ёндан хусусий лаборатория ҳам ўз фоилиятини бошлаб юборибди. Эшик тепасига «Intermed» деб ҳам ёзиб кўйишибди. Табиийки, навбатда ҳеч ким йўқ. Ҳамма текин лаборатория эшиги ёнида турнақатор тизилган. Айтишларича, энди хусусий клиникаларнинг лабораторияларига боришига ҳожат қолмас эмиш. Мени ўйлантирган нарса шу бўлдики, олдинлари текин бўлган баъзи бир таҳлиллар хусусий лабораторияяда олинадиган бўлса, бу аҳоли учун нима наф? Бу қандай муаммоларни келтириб чиқаришини кўз олдингизга келтирияпсизми?

Маълумотларга кўра, Софлиқни сақлаш вазирининг 2022 йил 7 январдаги 2-сонли бўйругига кўра, Тошкент шаҳри ва Тошкент вилоятининг барча оиласиий поликлиникалари, тиббиёт бирлашмаларининг марказий поликлиникалари, жами 178 та тиббиёт муассасасининг лабораториялари Марказлашган клиник диагностика лойиҳаси доирасида «Intermed Innovation» МЧЖ га топшириларкан. Лойиҳа бюджети 9,5 миллион АҚШ долларини ташкил этиб, бу бюджет маблағлари ва банк кредитларини жалб қилмасдан хусусий инвестициялар ҳисобидан шакллантириларкан. Айни пайдада лойиҳа Тошкент шаҳрининг Юнусобод ва Мирзо Улубек туманларидаги давлат поликлиникаларида ишга туширилди ва фойдаланишга топширилди. Тошкент бўйича тўлик



Ундан кўра аҳоли учун бепул таҳ- лиллар сонини кўпайтириш ҳақида ўйлаб кўрилса бўл- масмиди?

марказлаштириш 2022 йил 1 апрелдан режалаштирилган. Ушбу лойиҳа ёмон ва сифатсиз давлат хизматларидан воз кечиш учун қилинаётган эмиш. Аммо айни дамда мана шу хизматларга ҳам минглаб одамларда эҳтиёж бор. Шу ўринда савол туғилади. Ушбу пулли хизмат бизга керакмиди? Ундан кўра аҳоли учун бепул таҳлиллар сонини кўпайтириш ҳақида ўйлаб кўрилса бўлмасмиди?

Аслида мазкур буйруқ корхонанинг клиника-диагностика лабораторияси хизматлари бўйича Тошкент шаҳри ва Тошкент вилоятида ягона монопол компанияга айланишини билдиримайдими? Яъни хусусий монополия яратилади. Бу нима дегани? Яна битта монополия яратил-

ди, дегани. Нархларини суриштириб кўрдим. Битта таҳлил учун кетадиган пул камида 200-300 минг сўмга боряпти. Бу маблағ баъзи оиласалар бюджетига мутлақ тўғри келмайди-ку.

«Intermed Innovation» қандай йўл билан ёки қандай жараёнлар орқали лойиҳа оператори этиб танлаб олинганлиги, концессия шартлари, хусусан, ҳар бир тадқиқот тури бўйича лаборатория диагностикаси хизматининг энг юқори қиймати ҳақида маълумотлар йўқ.

Хўш, «Intermed Innovation» қаердан келиб қолди? Очиқ маълумотларга кўра, «Intermed Innovation» МЧЖ ҚҚ 99,3 фоизи улуши Шотландиядаги оффшорда, EDINBURGH, OFFICE 7, 196 ROSE STREET манзилидан рўйхатдан ўтган Silverdale Trade L.P. га тегишли ҳисобланаркан. «Intermed Innovation» МЧЖ ҚҚ билан Ўзбекистонда «HEALTH LAB PLUS» МЧЖ, шунингдек, солиқ ва божлар тўланмайдиган Жиззах эркин иқтисодий зонасидан рўйхатдан ўтиб олган «BEK OIL» МЧЖ, «JIZZAKH YM» МЧЖ ҚҚлар аффилланган. Компания ташкил этилгандан бўён компания Бош директори Олег Живетин экан.

Демак, борган сари беморга ташхис қўйдирб олишнинг ўзи катта муаммога айланяпти. Чунки ташхис қўйилгунгача бўлган жараёнда, яъни таҳлилларга қанча маблағ кетишини хом чут қилиш айни ҳолатни кўрсатиб беради.

МИЛЛИОН ДОЛЛАРЛИК КИТОБЛАР ҚАЙТАРИЛАДИМИ?



Ўзбекистон Миллий университетининг Нодир кўлёзмалар музейида сақланадиган «баҳоси миллион доллар» турувчи бир қатор китоблар – XIII асрда оид Абу Бакр Собунийнинг кўлёзма асари, Шарафиддин Али Яздийнинг XV асрда ёзилган «Муқаддима Зафарнома» кўлёзма китоби, Алишер Навоийнинг тилла суви юритилган «Ҳамса» достони ва бошқа ўнлаб нодир кўлёзмалари ЎзМУ кутубхонасидан «сирли» тарзда йўқолиб қолгани жамоатчиликни ташвишлантириб кўйганди.

Маълумотларга кўра, нодир китоблар сақланадиган маҳсус бино таъмирланиш учун уч йил илгари ёпилган ва очилганидан кейин юқорида тилга олинган асарларни бошқа ҳеч ким кўрмаган. Аслида ушбу музей 2006 йил 31 марта ташкил қилинган. 2018 йил Миллий университет 100 йиллигига бағишилаб чоп қилинган китобда Нодир кўлёзмалар музейида 1465 номдаги араб ёзуви ўзбек, форс, туркий, араб ва тоҷик тилларидаги кўлёзма китоблар, хат ва хужжатлар сакланиши айтилган.

Шу боис ушбу масала юзасидан Бош прокуратура суриштируви бошланди. Университет маъмуряти эса жамоатчиликка бир неча қадимий китобларни намойиш этдилар. Уларнинг таъкидлашича, бу айнан ўша номи тилга олинган нодир кўлёзмалар экан. Аммо миллион долларлик асарларни кўргани келганлар орасида бирорта ҳам университет маъмуряти гапларини тасдиқлайдиган мутахассиснинг йўқлиги, саволларни янада кўпайтирганди. Одамлар хоҳлаган эски китобни олиб, уни айнан ўша нодир кўлёзмалар, дея тақдим қилиш мумкинлиги эса ҳақиқатга яқин эди. Лекин университет маъмуряти

бизнинг Ўрта Осиёда етакчилик қиладиган экспертиза салоҳиятимиз ҳақида хабарлари бўлмаса керакда.

Шундан сўнг, ниҳоят прокуратуранинг текширишлари ўз ниҳоясига етиб, ЎзМУ Ахборот-ресурс маркази фондида сақланган XIII-XIX асрларга оид қиймати 2,6 миллиард сўмлик тарихий ва бадиий аҳамиятга эга 56 дона кўлёзма ва 6 дона тошбосма асарлар талон-торож қилингани ва бошқа жиддий қонунбузилиш ҳолатлари аниқланди. 2022 йил 19 февраль куни университет мансабдор ва моддий жавобгар шахслари, хусусан, Ахборот-ресурс маркази директори ва бошқаларга нисбатан Жиноят кодексининг 167-моддаси 3-қисми «а» банди, 207-моддаси 1-қисми ва 227-моддаси 1-қисми билан жиноят иши қўзгатилиб, иш хужжатлари тергов ҳаракатлари олиб бориш учун Тошкент шаҳар прокуратура-сига юборилган.

**Жиноятчилар
жазоланар, аммо
йўқотилган ёки сотиб
юборилган (хорижда
бундай ноёб кўлёзма-
лар жуда қиммат)
китоблар қайтари-
лармикан? Аслида
китоб ўғрилари ҳеч
қачон китобни қай-
тишимаган.**

Шу пайтгача қанчадан-қанча бундай ноёб асарлар талон-торож қилинганини ҳам билмаймиз. Юртимиз қадимий тамаддун марказларидан бири бўлгани боис кутубхоналаримиз, музею архивларимизда қиймати миллионлаб доллар билан ўчнадиган экспонатлар, нодир кўлёзмалар бисёр. Аммо уларнинг қаердалиги, қиймати, аҳамияти баён этилган ягона очиқ реестр шакллантирилмаган. Шакллантирилган бўлса, жамоатчиликка ошкор қилинмаган. Хуллас, биз – одамлар, ОАВ, жамоатчилик қанча номоддий бойликларимиз борлигини билмаймиз. Бу эса қингир ниятли кимсаларга қўл келиши тайин.

Шундай экан, масала юзасидан маҳсус реестрлар орқали очиқ жамоатчилик назорати йўлга қўйилмас экан, номоддий бойликларимизни талон-торож қилишни истаб қолувчилар топилаверади.

Нилуфар ЮНУСОВА.

ЭЪЛОН

Камалова Раъно Ҳусниддин қизига 2014 йилда Тошкент шаҳар Юнусобод дизайн касб-хунар коллежи томонидан берилган К №3543175 (Рег №98) рақамли диплом йўқолганлиги сабабли БЕКОР ҚИЛИНАДИ.

ИЖТИМОЙ ШАРТНОМА ТИЗИМИ КУЧАЙТИРИЛАДИ

Ижтимоий ҳимоя – кенг маънода мамлакат аҳолисини ижтимоий ва моддий муҳофаза қилинишини таъминлайдиган ҳамда жамиятда қарор топган хукукий, иқтисодий, ижтимоий чора-тадбирлар мажмуи. Бошқача айтганда, давлат ва жамиятнинг ёши, саломатлиги, ижтимоий аҳволи, тириклилоси воситалари билан етарли таъминланмагани туфайли кўмакка муҳтож фуқаролар тўғрисидаги гамхўрлигини англатади.

Президентнинг 2022 йил 28 январдаги ПФ-60-сон фармонида **Тараққиёт стратегиясида** инсон қадрини улуғлашга йўналтирилган ижтимоий ҳимоя сиёсати бўйича алоҳида вазифалар белгиланган бўлиб, улар доирасида аҳолини ижтимоий ҳимоя қилиш миллый стратегияси лойиҳасини ишлаб чиқиш, ижтимоий ҳимоя соҳасида ягона давлат сиёсатини амалга ошириш, ижтимоий суғурта тизимини яратиш, кам таъминланган оиласларга ижти-



моий ёрдам ва хизматларни ижтимоий шартнома асосида тақдим этиш, «Ижтимоий ҳимоя ягона реестри» ахборот тизимида алоҳида маълумотлар базасини яратиш каби мухим вазифалар белгилаб олинган.

Бу ўринда ижтимоий шартнома тизимида эътибор қаратадиган бўлсалак, дунё амалиётида ижтимоий шартномага қийин иқтисодий вазиятга тушиб қолган кишиларнинг ушбу вазиятдан чиқиб кетишини рагбатлантирадиган механизм сифатида қараш шаклланган. Шу боис бу тизим, аввало, камбағал оиласлар ва қи-

йин вазиятга тушиб қолган ёки ўз муаммоларини мустақил ҳал қила олмайдиган аёллар, кам таъминланган ва ночор аҳволда яшаётган, жамият иқтисодий ҳаётида ўз ўрнини топа олмайдиган, ўзини таъминлашга қодир бўлмаган ва факат давлатдан моддий ёрдам кутаётган фуқароларни қамраб олади.

Ижтимоий шартнома тизимидан кенг фойдаланишнинг вазифалари ва йўналишлари дастлаб 2020 йил 8 октябрь куни Президент Шавкат Мирзиёев раислигida бўлиб ўтган видеоселектор йигилишида белгиланганини қайд этиш лозим.

Айнан молиявий қийинчиликлар инсонларнинг таълим олиши ва касб-хунар эгаллашига асосий тўсиқ эканини ҳисобга олган ҳолда, унинг молиялаштириш манбалари аниқ белгилangan. Чунончи, ижтимоий шартнома доирасида новдавлат касб-хунар таълими марказларида, шунингдек, малака ошириш курсларида ўқиши истагини билдирган ёшлар ва аёллар ўқиши харажатларини қоплаш учун **бир миллион сўмгача субсидиялар** олишлари мумкин.

Ижтимоий шартнома тизимиning жорий этилиши Президент томонидан имзоланган «2021-2030 йилларда Ўзбекистон Республикаси аҳолисини ижтимоий ҳимоя қилиш тизимини такомиллаштириш чора-тадбирлари тўғрисида»ги фармойища ҳам алоҳида қайд этилган. 2021-2030 йилларда аҳолини ижтимоий ҳимоя қилиш миллый стратегияси концепцияси нуфузли ҳалқаро ташкилотлар, жумладан, Ҳалқаро меҳнат ташкилоти, Бирлашган миллатлар ташкилотининг тараққиёт дастури, БМТ болалар фонди, Жаҳон банки, Осиё тараққиёт банкининг Ўзбекистондаги ваколатхонаси ва Европа Иттифоқининг Ўзбекистондаги делегацияси билан ҳамкорликда ишлаб чиқилгани ижтимоий шартнома институти фуқароларимизни боқимандалик кайфиятидан ҳалос қилишнинг ва аҳолини ижтимоий ҳимоя қилиш самарадорлигини оширишнинг истиқболли тизими эканидан далолат беради.

Гулноза САТТАРОВА,
Олий Мажлиси хузуридаги
Қонунчилик муаммолари ва
парламент тадқиқотлари
институти бўлим бошлиғи,
юридик фанлари номзоди,
Зебинисо ШЕРБОЕВА,
Олий Мажлиси хузуридаги
Қонунчилик муаммолари ва
парламент тадқиқотлари
институти етакчи шлми
ходими.

Реклама

Ўзбекистон давлат
консерваторияси
куйидаги кафедралар бўйича
лавозимларга танлов ЭЪЛОН ҚИЛАДИ:

- ✓ «Мусиқа тарихи ва танқиди» кафедраси: кафедра мудири;
- ✓ «Академик хор дирижёрлиги» кафедраси: кафедра мудири, профессор;
- ✓ «Торли чолгулар» кафедраси: кафедра мудири;
- ✓ «Концертмейстерлик маҳорати» кафедраси: кафедра мудири;
- ✓ «Камер мусиқаси» кафедраси: кафедра мудири;
- ✓ «Пуфлама ва зарбли чолгулар» кафедраси: кафедра мудири;
- ✓ «Факультетлараро фортелисано ижроилиги» кафедраси: кафедра мудири;
- ✓ «Ўзбек тили ва ижтимоий фанлар» кафедраси: кафедра мудири;
- ✓ «Ўзбек мусиқаси тарихи» кафедраси: профессор;
- ✓ «Академик хонандалик ва опера тайёрлови» кафедраси: профессор;
- ✓ «Мусиқа назарияси» кафедраси: профессор, доцент, катта ўқитувчи;
- ✓ «Композиторлик ва чолгулаштириш» кафедраси: катта ўқитувчи.

**Танловда иштирок этиш учун даъвогарлар қуйидаги
хужжатларни тақдим этишлари лозим:**

ректор номига ариза;
ходимлар шахсий вақақаси;
олий маълумоти, илмий даражаси,
илмий унвони ҳақида диплом ва аттес-
татларнинг нусхалари;
ўқув-услубий, илмий-тадқиқот ва
илмий-ижодий ишлари рўйхати
мутахассислик бўйича охирги уч

ўқув ўилида малака оширганлиги тўғрисидаги гувоҳнома ва сертификатлар нусхаси;

Аризалар эълон чиққан кундан бошлаб бир ой мuddат ичida Ўзбекистон давлат консерваториясининг ходимлар бўлими томонидан қабул қилинади.

Манзил: 100027, Тошкент шаҳар, Шайхонтохур тумани, Олмазор кўчаси, 1-йй.

«Солиқчи — тадбиркорга кўмакчи»

Тошкент шаҳар Олмазор тумани Давлат солиқ инспекцияси Тадбиркорликни кўллаб-куватлаш шўйбаси ходимлари томонидан «Солиқчи — тадбиркорга кўмакчи» тамоили доирасида тадбиркорлик субъектларига манзилли кўмак бериш бўйича мунтазам амалий ишлар олиб борилмоқда.

Хусусан, 2021 йил давомида узоқ муддатан буён фаолият кўрсатмаётган 79 та корхона ҳамда 2020 йилда янги очилган ва пандемия шароитида фаолияти тўхтаб қолган 100 та тадбиркорлик субъекти фаолияти қайта тикланди ва ҳозирги кунда ушбу корхоналар ўз фаолиятини юритиб келмоқда.

Фаолияти тикланган корхоналарга, аввало, давлатимиз томонидан берилган имкониятлар, имтиёз ва преференциялар бўйича тушунтиришлар берилди. Дастробки бухгалтерия ишларини бошлашда солиқ ҳисоботларини тўғри, аниқ ва ҳаққоний юритиш бўйича солиқ хизмати ходимлари туман ҳоқимлиги, Марказий банк, туман электр тармоғи, туман газ таъминоти ва бошқа ташкилотлар мутасаддилари билан ҳамкорликда зарур би-

лилар берилди, корхоналардаги мавжуд муаммоларни ҳал этиш ва уларнинг иш фаолиятини бошлашга кўмак кўрса-тилди. Бунинг натижасида 2021 йил фаолияти тикланни, иш бошлаган корхоналар томонидан 4,8 млрд. сўмлик товар айланмаси амалга оширилишига ва бюджетга ўртача 192,0 млн. сўм кўшимча солиқ ундирилишига эришилди.

Бундан ташқари, ҳозирги кунда долзарб муаммолардан бири бўлган ишсизликни камайтириш бўйича тегишили «йўл харитаси» асосида ўртача 531 нафар ишсиз фуқаро бандлиги таъминланди ва туманимиздаги ишсиз аҳоли сони маълум маънода камайишига ҳисса кўшилди.

Шўйба ходимлари томонидан мунтазам равишида солиқ қонунчилигига киритилаётган ўзгариш ва янгиликлар ўрганилиб, тадбиркорлик субъектлари билан учрашувлар ташкил этилиб, уларга тушунтиришлар берил келинмоқда.

Тошкент шаҳар Олмазор тумани Давлат солиқ инспекцияси Тадбиркорликни кўллаб-куватлаш шўйбаси
(Реклама ҳуқуқи асосида)

АДВОКАТЛАР СУДЬЯ ВА ТЕРГОВЧИНИНГ РАҚИБИ ЭМАС



Бугун суд-хукуқ соҳасида жиддий ислоҳотлар кечяпти. Айниқса, адвокатлар фаолиятига доир қонунлар янада такомиллаштирилди. Аммо шунга қарамасдан одамлар негадир адвокатларга унчалик ишонмаяпти. Ҳатто айрим ҳолатларда адвокатларни фирибгарга ҳам тенгглаштиряпти. Эмишки, қоп-қоп ваъдалар бериб, жарақ-жарақ, пулингизни олиб, яна судда ютказиб қўйиштганмиш.

Асосий айб сиғатида адвокатларнинг ўз ишини миригача билмаслиги қайд этиляпти. Ростдан ҳам, аксарият адвокатлар фуқаролик, иқтисодий масалаларни тушунмайди. Бу масаланинг бир томони бўлса, иккинчи жиҳати, улар фаолиятида суд ва прокуратура билан боғлик муммо кўзга ташланяпти.

Бу мавзуда сұхбатлашған аксарият фуқаролар адвокаттарға ишонмаслигини очық-ойдін билдири.

Шу боис иккинчи томон
фикари билан ҳам қизиқдик.
Одамлар нега адвокатларга
ишонмайды? Бунинг сабаб-
дари нимада?

«Адвокат универсал» адвокатлик фирмаси ходими Нозим Умаровнинг фикрича, расман «очиқ», амалда эса ёпиқ суд тизимини ўзгартиру- мас эканмиз, минг зўр адво- кат бўлмасин натижа «нол»га тенг бўлаверади. Масалан, кейинги пайтда адвокатура фаолияти бўйича жиддий ислоҳотлар қилинди. Адво- катларга кўп ҳукуқлар берил- ди. Аммо амалда бу қонунлар барибир ишламаяпти.

Мисол учун, тергов ва суд жараёнига мобил телефон билан киришга рухсат берилган. Бироқ, кўп ҳолларда бунга судъя ва терговчилар рухсат бермайди. Нега деб сўрасак, ички тартиб шундайлигини айтишади. Ёки гувоҳларни судга чақириш ваколати-миздан ҳам суд хоҳламаса, фойдалана олмаймиз. Бу каби ҳолатлар тажриbamда кўп кузатилган. Адвокатларга суд ва прокуратура ходимлари худди рақибга қарагандек қарайди. Аслида бундай бўлмаслиги керак. Ёки мижоз ҳимояси учун келганимизда терговчилар бизни ташқарида



қолдиришади. Гарчи адвокат-лик фаолиятiga доир янгича қонунлар чиққан бўлса-да, жараён эскича тарзда бўляпти. Судларда ҳамон эскича сиёсат юритиляпти. Суд ҳукми, қарори ёки ажримидан норози бўлиб, апеляция берилса, яна ўша суд охирги сўзни айтади. Натижада иш касация тартибida кўришга юборилади. Мен бу фикрларим билан ҳамма адвокатлар яхши, виждонли, деган фикрни илгари сурмоқчи эмасман. Тўғри, ҳамкасбларим орасида ўз ишини яхши билмайдиган, қонунларни тушунмайдиганлар ҳам бор. Лекин бу ҳолат умумий манзарада барча адвокатларга баҳо бўлмаслиги керак. Яхши, профессионал адвокатлар кўп.

«Алимов групп» адвокат-лик бюроси раҳбари Алеёр Алимовнинг фикрича, адвокат мижоз ҳимоячиси, аммо бу жиноят қилган инсонни оқлаб беради, дегани эмас. Тергов ва суд жараёнини адолатли ўтиши, қарор, ҳукмлар тўғри чиқишини таъминлаб беради. Асло жиноятчини жазодан саклаб қолишга масъул эмас. Агар фуқаро жиноят содир этган бўлса, бу инсонга ёрдам бера олмайди. Афсуски, аксарият жиноят қилган одамларда ҳозир адвокат ёллайман, у мени кутқариб қолади, деган нотўғри қараш бор. Адвокат қораловчи, терговчи ёки суд томонидан иш бир томонлама кўрилаётган бўлса, қонунга замал килишини таъминлайди.

амал қилишни таъминлаиди.

Масалан, қўлимда бир иш бор. б ойдан бери аниқ бир жиноят бўйича жиноий иш оча олмаяпмиз. Мана шу каби ҳолларда адвокат хизмати зарур. Мутахассис шундай

**Агар фуқаро жи-
ноят содир этган
бўлса, бу инсонга
ёрдам бера ол-
майди. Афсуски,
аксарият жиноят
қилган одамлар-
да ҳозир адвокат
ёллайман, у мени
кутқариб қолади,
деган нотўғри
қарашибор.**

вазиятда мижозга хукуқий ёрдам беради.

Ёки бошқа бир ҳолатда ми-
жозим жиноят қилган. Буни
тан оляпти, бироқ терговчи
тергов давомида уни шу ишга
мажбур қилган иккинчи
томон айбини эътиборсиз
қолдиряпти. Мана шундай
вазиятларда эса мижозлар
гўёки адвокатни айблашга
ошиқади. Бу масалада пор-
талга ҳам мурожаат қилдим.
Ҳолатда жиноятни яширгани
учун терговчи ва прокуратура
ходимига жиноий иш кўзғаш
мумкин бўлса-да, натижа йўқ.
Масала шундаки, юқоридаги
ходимларга ким иш кўзғай-
ди? Лекин кишини хурсанд
қиласдиган жиҳат — охирги

пайтда судлар адвокатларга ёрдам беряпти. Шу каби эъти розларни айтсак, ишни қайткүриш учун кайтармокда.

Күриш у үчп қантармокда.
Энди бевосита мавзуга
қайтсак, терговда терговчи
томонидан нотүгри хулоса-
лар берилган, тергов жараё-
ни ни сохталаштириш се-
зилган бўлса, фактлар билан
асослаб, прокурорга ёзсак,
эътиборсиз қолмокда.

Масалан, тажрибамда 2017 йил шундай воқеа бўлган. Сирдарё вилояти Оқ олтин туманида бир фуқаро уй сотиш мақсадида танишидан 5 минг доллар пул олади. Кейинроқ нотариусда хужжат расмийлаштираётганда қолган суммани олишини айтган. Бу бўйича тилхатда кўрсатиб, уй учун 5 минг доллар олдим, деб ёзган. Аммо бу пулларни бошқа мақсадда ишлатиб юборган. Аммо уйни сотиш, олди-сотди шартно- масини расмийлаштиришни ортга суради. Мақсад аслида уйни сотиш бўлмаган. Бу жиноят кодексида фирибгарлик деб малакаланади. Бироқ терговда пул олган одам қарзга олгандим, дейди ва терговчи иш бўйича жиноят аломати бўлса-да, фуқаролик судига йўналтирган. Яъни

Судига иналтирган. Яни бир фуқаро иккинчисидан вақтингча қарзга пул олган, буни фуқаролик тартибида кўриш керак, деган хулоса берган. Мен эса бу ҳолатда фирибгарлик, яни Жиноят кодексининг 168-моддаси бўйича кўриш лозимлигини сўраб, прокурорга мурожаат қилдим. Терговда жиноятни яшириш борлигини билдирам.

Ишонасизми, шу фирибгарлик ортидан пул олган одам кейин мижозимга қасддан тұхмат уюштириди. Уни гиёх-ванд моддалар савдосида айлашди. Мана шу жараённи исботлашим учун 3-4 ойдан ортиқ вақтим кетди. Нихоят мижозимга қўйилган айб-ни ўйлаб топилганини тан олишди. Ҳатто ўша жараёнда «опер»лар қандай сўроқ, қилгани, алдаб кўрсатма олгани, сенга ёрдам берамиз, деб имза кўйдириб олганини видео ёзувлари бор. Бу уюштирилганини исботлаган бўлсак-да, барибир биринчи ҳолат

— 168-модда бүйича жиноят иши очилмади. Аслида ҳаммаси шундан бошланганди.

Яна бир муаммоли масала, бу мобил телефонлардан фойдаланишда учрамоқда. Президент Фармонида адвокатлар суд ишларида мобил телефондан фойдаланишига рухсат берилган. Аммо кўп ҳолларда судьялар бунга рухсат бермайди. Сабаби Фуқаролик кодексида суд жараёнини аудио тарзда ёзиб олиш ҳар икки томоннинг розилиги билан амалга оширилиши кўрсатилган. Афсуски, аксарият ҳолларда даъвогар ёки жавобгар томондан бири бунга қарши бўлади. Суд эса шуни асос қилиб, адвокатга мобил телефондан фойдаланишига таъсирийди.

Аслида суд ишларида
мобил телефонлардан фой-
даланиш учун барчага рухсат
берилса, адвокат хизматига
ҳожат қолмасди. Чунки жа-
раён ёзиб олинса, ўз-ўзидан
судда адолатсиз ва қонунга
зид қарор чиқариш имконсиз
бўлади. Агар шундай бўлса,
фуқароларда буни исбот-
лашга асос яратилади. Мана
шунда менимча, суд ишлари
янада шаффоғ ва адолатли
ўтиши таъминланади.

Колаверса, фуқароларнинг хукуқий онги ва маданияти ўзгармаса ҳамда хукуқни муҳофаза қилувчи орган ва судларда ишлаш тартиби ислоҳ қилинмаса, адвокатлар кўл-оёғи боғлиқ қолаверади. Колаверса, адвокат жиноят-чини оқлаб бера олмайди. Аксарият ҳолларда жиноят қилган инсонлар суд хукмидан кейин адвокатни айблашади.

Хулоса сифатида айтдиган бўлсак, қонун бўйича ижобий ечим топмайдиган иш учун ҳам адвокатни айблаш нотўғри. Адвокат қонунлар тақиқлаган чегарадан ўта олмайди ва ҳар қандай ҳолда ҳам мижозни оқлашга мажбур эмас. Афсуски, кўп ҳолларда ишнинг натижаси ўз фойдасига ҳал бўлмаса, одамлар адвокатни айбдор санайверади. Бизнингча, бу нотўғри караш, нотўғри ёндашув.

**Хайрулло
АБДУРАҲМОНОВ.**



ПУЛИ БОРЛАР

Қатнашадими?



Эътибор берганмисиз, қишлоқ болаларидан кўра, шаҳардаги ўғил-қизлар спорт тўгаракларига кўпроқ боришади. Сабаби, барча қишлоқларда ҳам спорт мактаблари, тўгараклар мавжуд эмас. Қолаверса, қишлоқ болаларининг кундалик юмушлари бевосита жисмоний ҳаракат ва очик ҳавода юриши билан боғлик.

Шаҳарда эса бунинг акси. Айнінса, кўп қаватли хонадонларда яшовчи болаларнинг бўш вақтини бирор машғулот билан банд этмасангиз, ўзини худди қамоқхонада яшаётгандай ҳис этиб, зерикиб кетаётганидан шикоят қиласеради. Шу боис ҳар бир ота-она иқтисодий имкониятидан келиб чиқиб, фарзандларининг бўш вақтини мазмунли ўтказиш учун турли – фан, хунар ва спорт тўгаракларига жалб этишади.

Мен ҳам кўпчилик қатори фарзандимни пойтахтдаги Болалар ва ўсмирлар спорт мактабларидан биридаги самбо спорт тўгарагига берганман. Белгиланган ойлик тўловларини ҳам тўлаб боряпман. Барчаси яхши, фарзандимда ўзгаришлар ҳам бор. Лекин...

Гап шундаки, мураббийи фарзандимни мусобақага қатнашишини сўради. Аввалига хурсанд бўлдим, бироқ қатнашиш учун 125 минг сўм тўлов пули борлигини эшишиб, ҳафсалам пир бўлди. Айтишларича, тўланган

пул чемпионат ўтказаётган ташкилотлар томонидан белгиланар экан.

Аммо Вазирлар Маҳкамасининг 2010 йил 23 сентябрдаги «Спорт мактаблари фаолиятини ҳамда спорт мактаблари тренерлари ва мутахассислари меҳнатини моддий рағбатлантириши тизимини янада токомилластириши тўғрисида»ги қарори билан тасдиқланган «Ўзбекистон Республикасидағи Ўзбекистон Республикаси Давлат бюджетидан молиялаштириладиган спорт мактаблари тўғрисида»ги Низомда спорт мактаблари ўқувчи-спортчиларнинг ўқув-машқ ўйнинларида, туман, шаҳар, республика ва ҳалқаро спорт тадбирларида қатнашишини таъминлаши белгилаб қўйилган. Ушбу низомда спорт мактаблари юридик ва жисмоний шахсларга ўз фаолияти ихтисосига мувофиқ жисмоний тарбия ва спорт соҳасида пулли хизматлар кўрсатиш, кўрсатилган хизматлар учун Ўзбекистон Республикаси қонун хужжатларига мувофиқ ҳақ тўлаш миқдорини белгилаши қайд этилган, лекин мусобақалар учун пул ундирилиши белгиланмаган.

Маълумот учун: Вазирлар Маҳкамасининг 2010 йил 23 сентябрдаги «Спорт мактаблари фаолиятини ҳамда спорт мактаблари тренерлари ва мутахассислари меҳнатини моддий рағбатлантириши тизимини янада токомилластириши тўғри-

Спортни ривожлантириши вазирлиги қуий тизимдаги бундай масалаларга эътибор қаратишади. Йўқса, ҳақиқий спортчилар қолиб, пули борлар чемпионатларга чиқишаверади. Жаҳон ареналарида муносиб ўрин эгаллай олмаётганизмнинг сабаби ҳам шундадир балки...



сида»ги қарорига асосан, Ўзбекистон Республикасидаги спорт мактаблари асосий фаолияти болалар, ўсмирлар ва ёшларни жисмоний тарбия ва спорт билан мунтазам шуғулланишга кенг жалб этишига, спорт заҳираси ва юқори маҳоратли спортчиларни тайёрлаш бўйича ўқув-машқ жараёнини самарали ташкил этишига йўналтирилган мактабдан ташқари спорт-таълим мусассалари ҳисобланади.

Шунингдек, мазкур Низомда спорт мактаблари томонидан ўқувчи-спортчиларнинг турли даражадаги мусобақалар ва ўйинли учрашувларда иштирокини ташкил этиш; спорт-соғломлаштириш оромгоҳларида ўқувчи-спортчилар билан машқ ўтказиш; етакчи спортчилар иштирокида ўқув видео ёзувларини, кино дастурларни ҳамда спорт мусобақаларини кўриш ва таҳлил қилиш ҳам қайд этилган.

Кўриниб турибдики, мусобақалarda иштирок этиши учун ота-оналардан маълум миқдорда пул ундириш белгиланмаган.

Суриштиришларимиздан маълум бўляпти, кўпчи-

лик ота-оналар мусобақалар пулли эканини таъкидлаш-япти. Масалан, Тошкент шаҳрида яшовчи Ботир Парпининг айтишича, 2010 йил дзюдо тўгарагида шуғулланиб келаётган фарзандининг Қозогистонда ўтказиладиган мусобақада қатнашиши учун 100 АҚШ доллари сўрашган. Шундан сўнг боланинг спортдан кўнгли совиган.

Бундай мисоллар кўп. Фақат аксарият ота-оналар фарзандининг келажагини ўйлаб, очиқ айтишини исташмайтири.

Аслида-чи, Аслида ҳар бир мураббий ўз гурухидаги етакчи спортчиларни мусобақаларга олиб чиқиши керак эмасми? Ёки ким пулни тўласар мусобақага боришадими? Ўйлай-мизки, янги ташкил этилган Спортни ривожлантириши вазирлиги қуий тизимдаги бундай масалаларга эътибор қаратишади. Йўқса, ҳақиқий спортчилар қолиб, пули борлар чемпионатларга чиқишаверади. Жаҳон ареналарида муносиб ўрин эгаллай олмаётганизмнинг сабаби ҳам шундадир балки...

Достон РУСТАМОВ.

Mahalla

Ижтимоий-сийёсий,
маънавий-маърифий газетаси

МУАССИС:

«Mahalla» nashriyot-matbaa uyi»
масъулияти чекланган жамияти

Ўзбекистон
Республикаси
Президенти
Администрацияси
хузуридаги Ахборот
ва оммавий
коммуникациялар
агентлиги томонидан
2019 йил 24 сентябрда
0019 рақами билан
давлат рўйхатидан
ўтказилган.

Бош мұхаррир
Бахтиёр АБДУСАТТОРОВ
«Mahalla» газетаси мұхаррiri
Санжар ИСМАТОВ
«Mahalla ko’zgusi» журнали мұхаррiri
Рустам ЮСУПОВ
Сахифаловчи:
Илҳом БОЛТАЕВ

«Шарқ» нашриёт-матбаа акциядорлик компанияси босмахонасида чоп этилди. Босмахона манзили: Тошкент шаҳри, Буюк Турон кўчаси, 41-йи. Формати – А-3, 3 босма табоб, 5000 нусхада чоп этилди. Буюртма Г-218
1 2 3 4 5 6

Таҳририят манзили:
Тошкент шаҳри, Мустақиллик шоҳкўчаси, 59-йи. Индекс: 100192
Телефонлар:
Қабулхона: 71 233-39-89,
Котибият: 71 237-56-80,
Факс: 71 233-10-73.
Баҳоси келишилган нархда.

Газета
таҳририят
компьютер
марказида
саҳифаланди ва
оффсет усулида
босилди.

Нашр кўрсаткичи: 148